



Komunikadu Imprensa
29 Abril 2022

**Selebra Aniversáriu JSMP ba dala XXI:
JSMP sei lansa relatóriu Anuál Setór Justisa, Lejislativu no Institusionál 2021**

Iha 28 Abril 2022 JSMP selebra ninia aniversáriu ba dala XXI no iha tempu hanesan halo lansamentu ba relatóriu 3 (tolu) mak hanesan **Relatóriu Observasaun Jerál Setór Justisa, Relatóriu Observasaun Parlamentár no Relatóriu Institusionál**.

Relatóriu anuál 3 (tolu) ne'e fó sai kona-ba rezultadu observasaun regulár JSMP nian iha Tribunál no Parlamentu Nasionál, atividade assisténsia legál ba vítima feto no labarik no gastu sira ba iha atividade JSMP nian durante tinan 2021.

“Kada tinan iha selebrasaun aniversáriu JSMP nian, sempre lansa mós relatóriu anuál 3 (tolu) ne'ebé relatóriu 2 (rua) relata kona-ba progresu no dezafiu sira iha sistema judisiáriu no parlamentu nasionál. Diferensia mak iha relatóriu setór justisa tinan 2021, JSMP inklui tan tópiku ida kona-ba atividade assisténsia legál ba vítima feto no labarik. Enkuantu relatóriu seluk relata kona-ba JSMP ninia atividade sira ne'ebé implementa iha tinan 2021,” dehan Sra. Ana Paula Marcál, Diretora Ezekutiva JSMP.

Relatóriu Observasaun Jerál Setór Justisa fó sai kona-ba progresu no dezafiu sira iha setór justisa nian, elaborasaun situasaun ka kazu sira violénsia bazeia ba jéneru no korrupsaun, relata JSMP nia atividade assisténsia legál ba vítima feto no labarik inklui estatística kazu sira ne'ebé prosesa iha tribunál distritál sira no Tribunál Rekursu durante tinan 2021.

Relatóriu Observasaun Parlamentár fó sai kona-ba funsionamentu Parlamentu Nasionál liga ho produtividade parlamentu iha lejislasaun nian no halo analiza kona-ba influénsia política iha prosesu lejislasaun sira iha Parlamentu Nasionál .

Enkuantu Relatóriu Instituisaun fó sai kona-ba atividade sira JSMP nian durante tinan 2021 inklui kooperasaun institusionál tantu nasionál no internasionál. Relatóriu ne'e mós deskreve apoiu finansiamentu ne'ebé JSMP simu husi doador sira nu'udar justifikasaun no forma akuntabilidade ba públiku.

Relatóriu ne'e konklui ho rekomendasaun importante no relevante balun ne'ebé dirije direktamente ba órgaun no instituisaun kompetente sira atu bele tau iha konsiderasaun. JSMP hein katak rekomendasaun importante hirak ne'e bele hetan konsiderasaun hodi hadi'ak funsionamentu sistema justisa formal no lejislativu iha agora no ba futuru.

Selebrasaun aniversáriu no lansamentu relatóriu sira ne'e, JSMP mós hetan mensajen husi parte relevante sira ne'ebé iha jerál hotu-hotu kontinua apoia JSMP iha JSMP nia atividade tomak, mak hanesan :

- Exelénsia Ministru Justisa, Dr. Tiago Sarmiento ne'ebé mós hanesan eis diretór JSMP, alende hato'o liafuan badak halo mós abertura
- Distintu Deputadu Komisaun A Parlamentu Nasionál, Sr. Adriano do Nascimento
- Merítisimu Juis Administradór Tribunál Distrital Dili, Dr. Afonso Carmona
- Dignísima Adjunta Prokuradór Jerál da Republika, Dra. Remigia de Fátima
- Exelénsia Defensoria Públiku Jerál, Dr. Cançio Xavier
- Exelénsia Komisáriu Anti Korrupsaun, Dr. Sergio Hornai

Partisipante sira iha eventu ne'e alende konvidadu sira ne'ebé mensiona iha leten, partisipa mós husi Dignísima Inspetora Prokuradoria, Dra. Jelia Trindade, ekipa Defensoria Públiku mak hanesan adjunta Defensoria Públiku Jerál, Dra. Olga Bareto, Pontu Fokál Jéneru Defensoria Públiku, Dra. Marcia Sarmiento, Dr. Estaque Guterres, Dr. Juvinal Yanes Freitas no Dr. Afonso Gomes, Adjuntu Komisáriu Komisaun Anti Korrupsaun ba asuntu prevensaun, Dr. Luis de Oliveira Sampaio ne'ebé mós nu'udar eis diretór JSMP, Representante Governu nian hanesan SEII no INDDICA, representante Embaxada sira, doadór sira husi USAID Activity, Hivos, CEPAD, parseiru sociedade sivíl sira hanesan ALFeLa, Fokupers, CODIVA, BELUN no seluk, akadémiku, mídia sira no parseiru sira hotu.

Atu hetan informasaun liután favor kontaktu:

Ana Paula Marçal
Diretora Ezekutivu JSMP
Telefone: 3323883 | 77040735
Website : <https://jsmp.tl/>